

Nach eim Jahr Pause do wet ich euch hüt Zobe weder begrüesse
s`letscht Jahr han ich chrankheitshalber leider ussetze müesse
defür fehlt hür mis ganze Team alli drü händ leider abgseit
gsänder so funktioniert be eus usglichendi Gerechtigkeit

De Neymar stoht wenn er ned grad liet uf em Fuessballplatz
de Simi Ammann stoht am Schanzetesch und macht denn en chline Satz
d`Martina Hingis stoht jetzt uf de Stross met eme Chenderwage das ahni
und d`Lara Gut die stoht im Winter uf de Schii und em Sommer uf de Behrami

No Rytz no fun heisst be de Grüene wosi d`Wahle händ gwonne gha
und ich träte drumm seit d`Regula Rytz zu de Bundesrotswahle a
und wenn er mech ned wähle tüend droht das sälstbewusste Wäse
jo de chonnt euch wie am Klimagepfel d`Greta cho d`Levite läse

Er nöchi vom Hallwilersee send 2 Puure so richtig am tobe
jo do het doch wäg erne Folietunnel d`Pro Natura Isproch erhobe
debie heigesi doch händ die Puure gseit die Tunnel numme welle benütze
damet si eri Aprikosebäum chönd vorem Kaiman schütze

Chürzlech beni er Brugger Altstadt e Shoppingtour go mache
i ha dänkt es heigi ned nor em Neumärt es paar hübschi Sache
doch zum chaufe hets leider nüt rächts gha jo du das esch s`miese
deför chom ich us jedem Lade met ere neue Friese

Bem Spatestech do verzelt is de vo de Swissgrid lang und breit
wiemer jetzt do die Starchstromleitig en Bode ihne verleit
chum het de sie Asproch de fertig gha frogt en euse Gmeindamme denne
du säg emol funktioniert de Treck au met ere Handyantenne
drufabe seit de de flotti Maa jo du aber secher doch
wa meinsch wiso bohrt jetzt de scho gli d`Nagra im Chräntel es Loch

Met em Golfplatz und em Thermalbad vo Schinznach jo was sprecht do degäge
chasch de Stadt Brugg nach de Fusion fascht scho Kurort säge
sie müesse jetzt nor no vom Bruggerbärg bes is Eisi abe welle
met eusne alte Starchstromleitigsmaschte e Seilbahn go anestelle

Jo wer het eigentlich em Riniker Wald umsverecke welle
das mer en Elsbeer- und en Duglasiebaum under Schutz duet stelle
e so en Seich ich sägs euch grad chan ich ned understütze
euse Wiehnachtsbaum met de neue Belüchtig de hät mer selle schütze

Au wenn ich nor us em Aargau chomm wett ich d`Basler Fasnacht mol lobe
sigs wäg em Cortège de geistriche Schnetzelbänk oder de Gugge am Zischtig Zobe
doch öppis regd`mi das Jahr tötlich uf ich chas fasch ned verdaue
gönd die doch eifach jetzt „heb di fescht“ eusere Gugge gos Motto chlaue

Vor 20 Jahr do duet z`Rinike en Güggelchrieg Schlagziele mache
jo und s`letscht Jahr sorged eusi Freaks das mer öber das Theater chönd lache
und s`nächst Jahr gäbs schiends no e Fortsetzig ich fend das grandios
jo und säb Stück das heisi de de Chrieg a de Herschestross

Er kennt sech us met grosse Lastwäge und mit Gäld als Vereinskassier
er esch Kampfrechter be de Liechtathlete und trenkt gärn am Stammtisch es Bier
ond er het sogar no Erfahrig als Pfarrer als Komissar und Polizescht
so jetzt weisch wiso de Siegrischt Ueli euse neuu Gmeirot escht

S`goht weder ufwärts met eusre Tannegg s`Aesse top s`Personal 1 A
doch fende es paar es seti no e flotti Serviertochter ha
doch ich fends cool das e dem Lokal nur Männer düend serviere
den chani nämli au den eis go zieh wenn d`Fraue düend demonstriere

Der Komedi²⁰

Wänd er me bsueche? Ich be dehei onder „www.komedi.ch“

Zugabervers 1

Psst psst psst psst psst psst psst psst psst psst psst psst psst
psst psst psst psst psst psst psst psst psst psst psst psst psst
über die alte Bundesröt und Kripto Affaire do hätti au no ein
doch de dörfi leider ned bringe well de esch sträng geheim

Zugabervers 2

Jo für min/i Ushelfshelgezeiger/i wär jetzt zum Schluss en Applaus abracht
well die/de het das wie ned andersch erwartet würkli super gmacht
und goht drumm jetzt be eusere Riniker Fasnacht sicher ie ed Annale
drumm getz vo mer jetzt do e chlises Gschänk und er chönd ehre/ehm eis zahle
und mer natürli au